

佛说戒德香经

东晋天竺三藏竺昙无兰译



南無本師釋迦牟尼佛

说明

本简体校正版《佛说戒德香经》电子书，是根据《乾隆大藏经》小乘阿含部，第 0584 部，东晋天竺三藏竺昙无兰译《佛说戒德香经》原藏雕板印刷影印本校正的，标点符号仅作参考。特此说明。

仁慧草堂

二〇一七年十月

佛说戒德香经

东晋天竺三藏竺昙无兰译

闻如是：一时，佛游舍卫国·祇树·给孤独园。

时，贤者阿难闲居独思：“世有三香，一曰根香，二曰枝香，三曰华香。是三品香，唯随风香，不能逆风。宁有雅香，随风、逆风者乎？”

贤者阿难独处思惟此义所归，不知所趣，即从坐起，往诣佛所，稽首足下，叉手前白佛言：

“我独处思惟，世有三香，一曰根香，二曰枝香，三曰华香。此三品香，唯能随风，不能逆风。宁有雅香，随风、逆风者乎？”

佛告阿难：“善哉！善哉！诚如汝问，有香真正随风、逆风。”

阿难白佛：“愿闻其意。”

佛言：“若于郡国、县邑、村落，有善男子、善女人，修行十善，身不杀、盗、淫，口不妄言、两舌、恶口、绮语，意不嫉、恚、痴；孝顺父母，奉事三宝，仁慈道德，威仪礼节。东方无数沙门梵志歌颂其德，南西北方、四维上下沙门梵志咸歌其德。某郡国土、县邑、村落，有善男子、善女人，及奉行善，敬事三宝，孝顺仁慈，道德恩

义，不失礼节。是香名曰随风、逆风，靡不周照，十方宣德，一切蒙赖”。

佛时颂曰：

虽有美香华	不能逆风熏
不息名栴檀	众雨一切香
志性能和雅	尔乃逆风香
正士名丈夫	普熏于十方
木密及栴檀	青莲诸雨香
一切此众香	戒香最无上
是等清净戒	所行无放逸
不知魔径路	不见所归趣
此道至永安	此道最无上
所获断秽源	降伏绝魔网
用上佛道堂	升无穷之慧
以此宣维义	除去一切弊

佛告阿难：“是香所布，无碍须弥、山川、天地，不碍四种地、水、火、风，通达八极，上下亦然。无穷之界，咸歌其德。一身不杀、盗、淫，世世长寿，其命无限；不盗窃者，世世富饶，又不忘遗，财宝常存，施为道根；不淫泆者，不犯他妻，所在化生莲花之中；不妄言者，口气香好，言可信之；不两舌者，家常和合，无别离业；

不恶口者，其舌常好，言辞辩通；不绮言者，人闻其言，莫不咨受，宣用为珍；不嫉妬者，世所生，众人所敬；不瞋恚者，世世端正，人见欢然；除愚痴者，所生智慧，靡不咨请；舍于邪见，常住正道，从行所得，各自然生，故当弃邪，从其真妙。”

佛说如是。时，诸比丘闻之欢喜，作礼而去。

《佛说戒德香经》卷终

回向偈

愿以此功德 普及于一切
我等与众生 皆共成佛道



此咒置经书中可灭误跨之罪

南无护法韦驮尊天菩萨

